

Epistolae familiares IV, 1, 21 (Mons Ventosus)

Ad Dionysium de Burgo Sancti Sepulcri ordinis sancti Augustini et sacrae paginae
professorem, de curis propriis

Mihi quidem multum adhuc ambigui molestique negotii superest.
Quod amare solebam, iam non amo; mentior: amo, sed parcius; iterum
ecce mentitus sum: amo, sed verecundius, sed tristius; iam tandem
verum dixi. Sic est enim; amo, sed quod non amare amem, quod
odisse cupiam; amo tamen, sed invitus, sed coactus, sed maestus et
lugens. Et in me ipso versiculi illius famosissimi sententiam miser
experior: *Odero, si potero; si non, invitus amabo.*